



Broj: 08-02-3-248/26

Goražde, 03.02.2026. godine

Na osnovu člana 46. stav (5), člana 47. stav (3) i člana 57 stav (3), Zakona o zdravstvenom osiguranju Federacije Bosne i Hercegovine ("Službene novine Federacije BiH" br. 30/97, 7/02, 70/08, 48/11, 36/18 i 61/22), i člana 19. Statuta Zavoda zdravstvenog osiguranja Bosansko-podrinjskog kantona Goražde, Upravni odbor Zavoda zdravstvenog osiguranja BPK Goražde, na 20 (dvadesetj) redovnoj sjednici održanoj dana 03.02.2026. godine, donosi:

PRAVILNIK

O NAKNADI PLAĆE ZA VRIJEME PRIVREMENE SPRIJEČENOSTI ZA RAD NA TERET SREDSTAVA ZAVODA ZDRAVSTVENOG OSIGURANJA BOSANSKO-PODRINJSKOG KANTONA GORAŽDE

Član 1. **(Opće odredbe)**

Pravilnikom o naknadi plaće za vrijeme privremene spriječenosti za rad na teret sredstava Zavoda zdravstvenog osiguranja Bosansko-podrinjskog kantona Goražde (u daljnjem tekstu: Pravilnik) bliže se utvrđuju uslovi, način i postupak ostvarivanja prava na naknadu plaće za vrijeme privremene spriječenosti za rad zbog bolesti ili povrede kada se ta naknada isplaćuje na teret sredstava obaveznog zdravstvenog osiguranja, visina naknade plaće i najviši iznos naknade plaće koja se isplaćuje na teret sredstava Zavoda zdravstvenog osiguranja Bosansko-podrinjskog kantona Goražde (u daljnjem tekstu: Zavod) i bliži način utvrđivanja valorizacije osnovice za naknadu plaće.

Član 2. **(Pravo na naknadu)**

Pravo na naknadu plaće za vrijeme privremene spriječenosti za rad (u daljnjem tekstu: naknada plaće) ostvaruje osiguranik koji je privremeno spriječen za rad zbog bolesti ili povrede, ukoliko je privremena spriječenost za rad utvrđena pod uslovima i na način utvrđen Zakonom o zdravstvenom osiguranju, važećim Pravilnikom o postupku i kriterijima za utvrđivanje privremene spriječenosti za rad zbog bolesti, povrede ili drugih okolnosti i ovim Pravilnikom.

Član 3. **(Osnovica za naknadu)**

(1) Osnovica za naknadu plaće je neto plaća isplaćena osiguraniku, umanjena za zakonom propisane doprinose iz osnovice i poreze, a koja je isplaćena osiguraniku u mjesecu koji je prethodio mjesecu u kojem je nastupila privremena spriječenost za rad.

(2) Osnovica za povrat naknade za osiguranika koji je istovremeno i obaveznik uplate doprinosa (samostalna djelatnost) je osnovica na koju je obračunavao i uplaćivao doprinos za obavezna osiguranja, umanjena za zakonom propisane doprinose iz osnovice.

(3) Osnovica za utvrđivanje naknade plaće za osiguranike u rudnicima uglja, tekstilnoj, kožnoj i industriji obuće kojima se isplaćuje najniža plaća i nisko akumulacijskim djelatnostima tradicionalnih esnafskih zanata, utvrđenih posebnim propisom kantonalne skupštine, je osnovica propisana članom 6. stav 1. tačka 10. Zakona o doprinosima umanjena za zakonom propisane doprinose iz osnovice i poreze.

(4) Osiguraniku koji obavlja obrtničku djelatnost, samostalnu djelatnost u poljoprivredi i šumarstvu, odnosno samostalno u obliku zanimanja obavlja profesionalnu djelatnost, za utvrđivanje osnovice za naknadu uzima se mjesečna osnovica osiguranja tog osiguranika za obračun i uplatu doprinosa za obavezno zdravstveno osiguranje, umanjena za zakonom propisane doprinose i poreze.

(5) Izuzetno, kada se osnovica za naknadu utvrđuje na osnovu više osnovice osiguranja izabrane odlukom osiguranika, tako izabrana osnovica osiguranja čini osnovicu za naknadu u skladu sa stavom 4. ovog člana, ako je osiguranik na osnovu te osnovice bio zdravstveno osiguran najmanje šest mjeseci prije mjeseca u kojem je nastupio slučaj na osnovu kojeg se stiče pravo na naknadu.

(6) Pravo na naknadu plaće, osigurana lica mogu ostvariti pod uslovom da je obaveznik doprinosa izmirio obavezu uplate doprinosa u skladu sa važećim propisima i da je u prethodnih 6 mjeseci neprekidno ili u prethodnih 12 mjeseci sa prekidima osigurano lice provelo na radu.

Osiguranik nema pravo na naknadu plaće pod uslovima iz člana 45. Zakona o zdravstvenom osiguranju FBiH.

Član 4.

(Valorizacija osnovice za naknadu plaće)

(1) Utvrđena osnovica iz člana 3. ovog Pravilnika se valorizuje osnovica kada osiguranik prima naknadu plaće neprekidno duže od tri mjeseca i ako je prosječna plaća radnika kod pravne ili fizičke osobe kod koje je osiguranik zaposlen, porasla za više od 5%, a prema zahtjevu i dokumentaciji poslodavca kojom dokazuje isto.

(2) U slučaju iz stava (1) ovog člana, valorizovana naknada plaće pripada osiguraniku od prvog dana narednog mjeseca po isteku tri mjeseca neprekidnog korištenja naknade plaće, ako je ispunjen uslov za povećanje naknade.

Član 5.

(Visina naknade plaće)

(1) Naknada neto plaće određuje se u visini od najmanje 80% osnovice za naknadu u slučajevima privremene spriječenosti za rad, koja se refundira od strane Zavoda, s tim da ne može biti niža od iznosa minimalne plaće važeće za mjesec za koji se utvrđuje naknada.

(2) Izuzetno iz stava (1) ovog člana, a u skladu sa članom 47. Zakona, naknada plaće iznosi 100% od osnovice za naknadu i to:

- a) za vrijeme privremene spriječenosti za rad zbog bolesti i komplikacija prouzrokovanih trudnoćom i porođajem,
- b) za vrijeme privremene spriječenosti za rad zbog transplantacije živog tkiva i organa u korist druge osobe.

Član 6. **(Obračun i isplata naknade plaće)**

- (1) Obračun i isplatu naknade plaće osiguranika od prvog dana privremene spriječenosti za rad pa sve dok ta spriječenost traje, vrši poslodavac kod kojeg je osiguranik zaposlen, s tim da je poslodavac obavezan isplaćivati naknadu plaće na svoj teret za prvih 42 dana bolovanja.
- (2) Povrat isplaćene naknade iz stava 1. ovog člana vrši Zavod u roku od 45 dana od dana prijema urednog zahtjeva za povrat.
- (3) Pravna, odnosno fizička lica, podnose zahtjev za povrat isplaćene naknade na neto isplaćeni iznos naknade.
- (4) Plaćanje doprinosa i poreza obaveza je pravne, odnosno fizičke osobe kod koje je zaposlen osiguranik.
- (5) Ako bolovanje traje neprekidno ili u prekidima ukupno 12 mjeseci za istu bolest u toku dvije kalendarske godine, izabrani doktor medicine primarne zdravstvene zaštite obavezan je upititi osiguranika nadležnom organu penzijskog i invalidskog osiguranja koji donosi ocjenu radne sposobnosti i invalidnosti, najkasnije u roku od 60 dana od dana prijema prijedloga izabranog doktora medicine.

Osiguranik ima pravo na naknadu plaće na teret sredstava Kantonalnog zavoda zdravstvenog osiguranja do navršenih 14 mjeseci neprekidnog trajanja privremene spriječenosti za rad.

Osiguranik koji je upućen nadležnom Institutu za medicinsko vještačenje zdravstvenog stanja dužan je u roku od 60 dana i nakon isteka ovog roka od dana prijema prijedloga izabranog doktora medicine, Zavodu zdravstvenog osiguranja Bosansko-podrinjskog kantona Goražde, dostaviti ocjenu radne sposobnosti i invalidnosti u skladu sa odredbama člana 60. Zakona o zdravstvenom osiguranju.

- (6) Ako nadležni organ penzijskog i invalidskog osiguranja ne donese ocjenu radne sposobnosti i invalidnosti u roku iz stava 5. ovog člana, kantonalni zavod osiguranja će i dalje isplaćivati naknadu plaće osiguraniku, ali je nadležni organ penzijskog i invalidskog osiguranja obavezan vratiti isplaćenu naknadu kantonalnom zavodu osiguranja, najkasnije u roku od 30 dana od dana prijema zahtjeva za povrat.

Član 7. **(Najviši iznos naknade plaće na teret sredstava Zavoda)**

- (1) Najviši iznos naknade plaće za vrijeme privremene spriječenosti za rad na teret sredstava Zavoda koji se refundira obavezniku uplate doprinosa, odnosno poslodavcu je 80% od neto plaće koja je isplaćena osiguraniku u mjesecu koji je prethodio mjesecu u kojem je nastupila privremena spriječenost za rad, s tim da neto plaća ne može biti veća od 80% jedne prosječne neto plaće

isplaćene u Federaciji BiH u periodu od I - IX mjeseca prethodne kalendarske godine prema podacima Federalnog zavoda za statistiku.

Član 8.

(Najniži iznos naknade plaće na teret sredstava Zavoda)

(1) Najniži iznos naknade neto plaće koja se isplaćuje na teret sredstava obaveznog zdravstvenog osiguranja ne može biti niži od iznosa najniže plaće utvrđene propisima nadležnih organa u Federaciji BiH.

(2) Ukoliko poslodavac isplaćuje neto plaću nižu od najniže plaće iz stava (1) ovog člana i za taj iznos traži povrat, Zavod će mu izvršiti povrat samo iznosa koji je poslodavac isplatio i naveo u svom zahtjevu.

Član 9.

(Uslovi za ostvarivanje prava na naknadu plaće na teret sredstava Zavoda)

(1) Pravna odnosno fizička lica stiču pravo na refundaciju naknade plaće na teret sredstava Zavoda po osnovu privremene spriječenosti za rad, pod uslovom da nema dospjelih a neuplaćenih doprinosa za obavezno zdravstveno osiguranje za period za koji podnosi zahtjev.

(2) Izuzetno iz stava (1) ovog člana su slučajevi kada obaveznik uplate doprinosa, odnosno poslodavac zaključi sporazum o plaćanju dugovanja u ratama sa Poreznom upravom FBiH, u tom slučaju ostvaruje pravo na povrat naknade neto plaće ostvaruje po izmirenju obaveza zaključno sa mjesecom za koji se traži povrat naknade plaće i isti uredno izmiruje u skladu sa otplatnim planom.

Član 10.

(Podnošenje zahtjeva za refundaciju naknade plaće)

(1) Zahtjev za refundaciju isplaćene naknade plaće za vrijeme privremene spriječenosti za rad podnosi poslodavac Zavodu zdravstvenog osiguranja Bosansko-podrinjskog kantona Goražde.

Član 11.

(Prilozi uz zahtjev za refundaciju naknade plaće)

(1) Uz zahtjev za povrat naknade neto plaće, podnosilac je obavezan priložiti sljedeću dokumentaciju:

1) Izvještaj o privremenoj spriječenosti za rad izabranog (ovlaštenog) doktora medicine (doznaka za bolovanje), potpisanu i ovjerenu pečatom,

2) Potvrda o isplaćenju neto plaći u koju se u određene rubrike unose podaci neto plaća za mjesec koji je prethodio utvrđivanju privremene spriječenosti za rad, potpisan i ovjeren pečatom,

3) Platnu listu osiguranika (original ili ovjerenu fotokopiju koju ovjerava podnositelj zahtjeva), uz anonimiziranje svih podataka izuzev imena i prezimena osiguranika, bruto i neto plaće, za mjesec koji je prethodio mjesecu u kojem je nastupila privremena spriječenost za rad osiguranika,

- 4) Platnu listu osiguranika (original ili ovjerenu fotokopiju koju ovjerava podnositelj zahtjeva), uz anonimiziranje svih podataka izuzev imena i prezimena osiguranika, bruto i neto plaće, za mjesec za koji se traži refundacija naknade plaće,
- 5) Ukoliko je osiguranik izoliran kao kliconoša ili zbog pojave zaraze treba priložiti Rješenje nadležnog inspektorata ili organa,
- 6) Izjavu samostalnog obaveznika koji nema zaposlenih radnika, da za vrijeme trajanja privremene spriječenosti za rad ne obavlja registrovanu djelatnost (ovjerena),
- 7) U slučaju valorizacije osnovice za naknadu plaće: obračun valorizacije i dokaz o valorizaciji.
- 8) u slučaju iz člana 9. ovog Pravilnika: sporazum o plaćanju u rate dugovanja sa Poreznom upravom FBiH.
- 9) Uvjerenje od Kantonalnog poreznog ureda da nema duga po osnovu javnih prihoda, odnosno da nema duga po osnovu doprinosa za zdravstveno osiguranje.
- 10) Specifikacija isplaćenih plaća za mjesec za koji se potražuje naknada (obrazac 2001)

(2) Poslodavac je prilikom podnošenja zahtjeva za povrat isplaćene naknade plaće obavezan priložiti kompletnu dokumentaciju propisanu ovim Pravilnikom.

Član 12. **(Plaćanje refundacije naknade plaće)**

- (1) Refundaciju isplaćene naknade plaće Zavod će izvršiti u roku od 45 dana od dana podnošenja urednog zahtjeva.
- (2) Pravo na refundaciju naknade plaće za vrijeme privremene spriječenosti za rad na teret sredstava Zavoda zastarijeva u skladu sa odredbama Zakona o obligacionim odnosima.

Član 13. **(Obavijest)**

- (1) Zahtjev za povrat isplaćene naknade plaće, može se osporiti u cijelosti ili djelimično, ukoliko obračun i isplata naknade plaće nije izvršen u skladu sa Zakonom i ovim Pravilnikom.
- (2) Ukoliko se osporava zahtjev iz stava (1) ovog člana, o razlozima osporavanja obavještava se poslodavac za povrat isplaćene naknade plaće, pismeno, u roku od 45 dana od dana podnošenja zahtjeva za povrat.
- (3) Zavod je obavezan pismenim aktom kojim se vrši povrat isplaćene naknade plaće, obavijestiti poslodavca.

Član 14.
(Zastara prava)

Pravo na povrat naknade plaće za vrijeme privremene spriječenosti za rad zastarijeva u roku od pet godina.

Član 15.
(Prelazne odredbe)

Svi zahtjevi za povrat naknade plaće koji su zaprimljeni, a nisu okončani do dana stupanja na snagu ovog Pravilnika, kao i sve privremene spriječenosti za rad čiji je prvi dan privremene spriječenosti za rad utvrđen od strane izabranog doktora medicine prije stupanja na snagu ovog Pravilnika i za koje nije podnesen zahtjev za refundaciju naknade plaće na teret sredstava Zavoda od strane poslodavca, završit će se po odredbama propisa koji je bio na snazi do stupanja na snagu ovog Pravilnika.

Član 16.
(Prestanak važenja)

Stupanjem na snagu ovog Pravilnika prestaje da važi Odluka o naknadi plaće za vrijeme privremene spriječenosti za rad na teret sredstava Zavoda zdravstvenog osiguranja Bosansko-podrinjskog kantona Goražde broj: 14-2906/09 od 31.08.2009. godine.

Član 17.
(Stupanje na snagu)

Ovaj Pravilnik objavit će se na oglasnoj tabli i na web stranici Zavoda, a stupa na snagu 01. januara 2026. godine.

Dostava:
-Naslovu
-a/a

Predsjednik Upravnog odbora

Enver Ratković